

Headlines

1. प्रधानमंत्री नरेंद्र मोदी होरें संविधान गी लागू करने दे 75 ब'रे पूरे होने कोला पैहले संविधान गी मार्गदर्शन आहली लोऽ करार दित्ता ऐ।
2. अपने माहवार "मन की बात" कार्यक्रमै च मोदी होरें लोकें गी अगले बरे महाकुम्भ च शामिल होने ते समाज थमां बंडु ते नफरत खत्म करने दा आह्वान कीता ऐ।
3. लेफ्टिनेंट गवर्नर मनोज सिन्हा होरें आखेआ ऐ जे स्कूली शिक्षा दा मुंडला मकसद बच्चें दी बौद्धिक समर्थ गी बधाना ऐ।
4. पिच्छले द'ऊं दिनें थमां बंद पेदी जम्मू-श्रीनगर राश्ट्री जरनैली शिडक गी अज्ज गड्डिएं दी आओजाई लेई खोली दित्ता गेआ ऐ। मुगल रोड अजें बी बंद ऐ।
5. मौसम विभाग नै उत्तर भारत लेई सीत लैहर दी चेतावनी जारी कीती। जम्मू ते कश्मीर खित्तें दे केई इलाकें च तापमान सिफर थमां हेठ दर्ज कीता गेआ ऐ।

<><><><><><>

PM-Mann Ki Baat(Constitution)

प्रधानमंत्री नरेन्द्र मोदी होरें अज्ज आखेआ ऐ जे संविधान, स्हाड़े देसै गी बत्त दस्सने आहली लोऽ ऐ ते एहू स्हाड़े सब्बनें आस्तै बड़े मानै आहली गल्ल ऐ जे अगले ब'रे 26 जनवरी गी स्हाड़ा संविधान अपने 75 ब'रे पूरे करै करदा ऐ। आकाशवाणी पर अज्ज अपने मन की बात कार्यक्रम दे राहें देश-विदेश दे लोकें कन्नै विचार सांझे करदे होई श्री मोदी होरें आखेआ जे भारत दे संविधान नै समें दी हर कसौटी गी खरी चाल्ली पार कीता ऐ। उनें गलाया जे देसै दे बसनीकें गी संविधान दी विरासत कन्नै जोड़ने आस्तै कॉन्स्टीट्यूशन 75 डॉट कॉम नांऽ दी इक विशेष वैबसाईट बनाई गेई ऐ।

प्रधानमंत्री होरें अपने "मन की बात" कार्यक्रमै च औंदी 13 जनवरी थमां प्रयागराज च शुरु होआ करदे महाकुम्भ दा बी जिक्र कीता। उनें गलाया जे प्रयागराज च संगम दे कंडुं पर एहदी तैयारिएं गी जोरें-शोरें मुक्कदा रूप दित्ता जा करदा ऐ। प्रधानमंत्री होरें लोकें गी अपील कीती जे ओहू बंडु ते नफरत दी भावना गी तज्जने दा धेइया करन। 'महाकुम्भ का संदेस, एक हो पूरा देश' दा नारा

दिंदे होई श्री मोदी होरें मेद जाह् क्कीती जे गंगा दी धारा आह्ला लेखा स्हाडा समाज बी संगठित बनोग।

एनीमेशन दी दुनिया दा जिक्र करदे होई श्री मोदी होरें गलाया जे कृष, तृष ते बाल्टीबाँय यानि केटीबी आहली सुपरहिट एनीमेशन सीरीज़ बच्चें च बड़ी मती लोकप्रिय ऐ। उनें दस्सेआ जे एहू त्रौनें एनीमेशन करैक्टर लोकें गी भारत दे स्वतंत्रता संग्राम कन्नै जुडे दे ओकडे नायकें बारै जानकारी दिंदे न जिंदे बारै च आमतौर पर मती चर्चा नेई हुंदी। हाल च गै एहदा दुआ सीज़न भारत दे अंतराश्ट्री फिल्म उत्सव दौरान गोआ च लांच होआ हा। श्री मोदी होरें दस्सेआ जे इस सीरीज़ दा प्रसारण नां छडा भारती भाशाएं च सगुआं विदेशी भाषाएं च बी कीता गेआ। इसी दूरदर्शन ते होरनें ओटीटी प्लेटफार्में पर बी दिक्खेआ जाई सकदा ऐ। प्रधानमंत्री मोदी होरें आखेआ जे भारत दी एनीमेशन फिल्में, नियमित फिल्में ते टीवी धारावाहिकें दी लोकप्रियता एहू दस्सदी ऐ जे भारत दे रचनात्मक उद्योग च किन्नी बड़ी समर्थ मजूद ऐ। उनें “एक भारत –श्रेष्ठ भारत” दे जज्बे गी मता मजबूत बनाने लेई भारत दे फिल्म ते मनोरंजन उद्योग गी मुबारकबाद दित्ती।

अपने अज्जै दे मन की बात कार्यक्रमै च श्री मोदी होरें सेहत खेत्तर च भारत दिएं द'ऊं बड़ी उपलब्धिएं दा बी जिक्र कीता। उनें इस गल्लै पर संदोख जाह् कीता जे विश्व सेहत संगठन दी रिपोर्ट मूजब, भारत च मलेरिया दे मामलें ते 2015 थमां 2023 बश्कार एहदे करी होने आहली मौतें च 80 फीसद दी कमी आई ऐ।

<><><><><><>

LG-School Functions

उपराज्यपाल मनोज सिन्हा होरें अज्ज जम्मू यूनिवर्सिटी दे जनरल जोरावर सिंह स्टेडियम च जम्मू संस्कृत स्कूल दे सालाना समारोह च हिस्सा लैता। अपने संबोधन च उपराज्यपाल होरें इस मौके पर स्कूल दे अध्यापकें, विद्यार्थियें ते अमले गी मुबारकबाद दित्ती। उपराज्यपाल होरें आखेआ जे स्कूली शिक्षा दा मुख मकसद बच्चें दी बुद्धिमता गी बदाना ऐ। उनें आखेआ जे स्कूल कैपस च गै राष्ट्र दा भविक्ख तय कीता जंदा ऐ। शिक्षा प्रणाली दा मकसद ऐ हर बच्चे गी इक ऐसा

<><><><><><>

Manmohan Ashes

साबका प्रधानमंत्री डाक्टर मनमोहन सिंह हुंदी अस्थिएं गी अज्ज मजनू का टीला गुरुद्वारे कश यमुना नदी च विसर्जित करी दित्ता गेआ। डाक्टर मनमोहन सिंह हुंदे परोआर दे सदस्ये अज्ज बड्डुलै निगमबोध घाट थमां उंदी अस्थियां किट्टी कीतीआं ते मगरा जमुना नदी च उनें गी विसर्जित करी दित्ता। डाक्टर मनमोहन सिंह हुंदी धर्मपत्नी गुरशरण कोर ते उंदिआं त्रौनें धीआं उपिंदर सिंह, दमन सिंह ते अमृत सिंह हुंदे सने होर दुए रिश्तेदार बी अस्थी विसर्जन दे बेल्ले उत्थे मजूद हे। सिक्ख परंपरा दे तैहत हून डाक्टर मनमोहन सिंह हुंदे परोआर आसेआ पैहली जनवरी गी 3, मोतीलाल नेहरू मार्ग पर स्थित उंदे सरकारी निवास पर अखंड पाठ दा आयोजन कीता जाह्गा। एह्दे परैन्त औंदी 3 जनवरी गी संसद परिसर दे नेडे स्थित रकाब गंज गुरुद्वारे च भोग, अंतिम अरदास ते कीर्तन दा आयोजन बी कीता जाना ऐ। डाक्टर मनमोहन सिंह हुंदा काल 26 दिसम्बर गी दिल्ली दे एम्स अस्पताल च होआ हा।

<><><><><><>

National-Highway

जम्मू-श्रीनगर राश्ट्रीय जरनैली शिडकै गी अज्ज गड्डिये दी आओजाई लेई खोली दित्ता गेआ ऐ। जम्मू-कश्मीर च खराब मौसम ते भारी बर्फबारी मगरा शुक्रवारें थमां हाइवे 2 दिनें तगर बंद रेआ। ट्रैफिक अधिकारिये जानकारी दित्ती ऐ जे सोआरी आहली गड्डिये गी दौनें बक्खी जाने दी खुल्ल दित्ती गेई ऐ। उनें आखेआ जे यात्रिये गी सलाह दित्ती गेई ऐ जे ओहू अपनी लेन च गै चलन ते जरनैली शिडकै दे बनिहाल-काजीगुंड आहले हिस्से पर ध्यान कर्नै गड्डी चलान कीजे शिडकै पर फिसलन आहली स्थिति अजे बी बनी दी ऐ। अधिकारिये अगगे जानकारी सांझा कीती ऐ जे जम्मू खितते च मुगल रोड सोनामर्ग-कारगिल शिडक ते भद्रवाह चम्बा रोड शिडके पर बर्फ किट्टी होई जाने करी गड्डिये दी आओ-जाई लेई अजे बी बंद ऐ।

<><><><><><>

JKSSB-Exam

जम्मू कश्मीर सर्विस सलेक्शन बोर्ड नै जूनियर सटैनोग्राफर ते Steno टाईपिस्ट जे मतेहान दी तरीक गी अगडा पाई दिता ऐ एहू इम्तेहान पैहले 29 दिसम्बर 2024 गी होना हा हुन एहू इम्तेहान 31 दिसम्बर 2024 गी होगा। जम्मू-कश्मीर सर्विस सलेक्शन बोर्ड दी नोटिफिकेशन मूजब मतेहान दा समां, थाहर ते शिफ्ट पैहले आहली गै रहौगा। पैहले सोयां जारी एडमिट कार्ड बी 31 दिसम्बर लेई मान्य होगा।

Chess-Humpy

शतरंज च, न्यूयार्क च खेड्डी गेदी वर्ल्ड रेपिड एंड ब्लिट्ज़ प्रतियोगिता च भारत दी कोनेरू हम्पी नै इंडोनेशिया दी आईरीन सुकान्देर गी हराइयै महिलाएं दी श्रेणी च अपना दुआ खिताब जित्ती लैता ऐ। हम्पी नै इस प्रतियोगिता दे 11 राउंड च 8 इशारिया 5 अंक हासल कीते। 37एं बरें दी एह भारती खड्डारन, चीन दी जू वेनजून दे बाद इक्कली ऐसी खड्डारन बनी गई ऐ जिन्नै इक्क कोला मती बारी खिताब अपने नांS कीता ऐ। भारती शतरंज ग्रैंड-मास्टर हम्पी होरें एह्दे शा पैह्ले 2019 च जार्जिया च खिताब जित्तेआ हा। तोआई मर्दे दी श्रेणी च रूस दे 18एं बरें दे खड्डारी वोलोदार मुरज़िन नै एह प्रतियोगिता जित्ती लैती ऐ। इस जित्त कन्नै ओहू दुए सब्बनें शा युवा फिडे विश्व रैपिड चैंपियन बनी गे ना। तोआई प्रधानमंत्री नरेन्द्र मोदी होरें 2024 फिडे महिला वर्ल्ड रैपिड चैंपियन जित्तने पर कोरेरू हम्पी गी मुबारकबाद दिती ऐ। सोशल मीडिया पर इक पोस्ट राहें श्री मोदी होरें दुआ विश्व रेपिड प्रतियोगिता दा खिताब जित्तने पर शतरंज ग्रैंड मास्टर हुंदी सराहना कीती ते आखेआ जे हम्पी हुंदा जज्बा ते शानदार प्रदर्शन लक्खां बद्धे लोकें गी प्रेरित करदा रौह्गा।

<><><><><><>

Cricket

क्रिकेट च मेलबर्न च खेड्डी जा'रदी बार्डर गवास्कर ट्रॉफी दे चौथे टेस्ट मैच दे चौथे दिन अज्ज अपनी दुई पारी च आस्ट्रेलिया दे स्काट बोलैंड ते नाथ लेयोन दी 55 रन्हें दी नाबाद सांझेदारी दी बदौलत आस्ट्रेलिया नै दिनै दा खेड्ड मुक्कने तगर 9 विकटें दे नुकसान पर 228 रन्ज बनाई लैते न जेदे कन्नै भारत खलाफ आस्ट्रेलिया गी 333 रन्जें दी बद्धत हासल होई गई ऐ। तोआई भारत दी तरफा गेंदबाज जसप्रीत बुमराह नै इक्क ओवर च Travis head ते Mitchell Marsh दौनें दी विकट हासल करने सने कुल 4 विकटां लेइयै इक बड्डी कामयाबी अपने नां कीती। एह्दे कन्नै उनें भारत लेई खेडदे होई 200 टेस्ट विकटां अपने नां करी लैतियां ना। तोआई मोहम्मद सिराज नै 3 विकटां लैतियां। 5 टैस्ट मैचें दी श्रृंखला इस्सलै 1-1 कन्नै बरोबरी पर ऐ।

<><><><><><>

Weather

भारती मौसम विभाग नै अज्जै थमां उत्तर भारत च सीत लैह सरबंधी चेटावनी जारी कीती ऐ। अपने भविक्खवाणी च मौसम विभाग नै आखेआ ऐ जे पच्छमी ब्हाएं च खौदल करी अगले द'ऊं दिनें दरान उत्तर-पच्छमी भारत च घट्टोघट्ट तापमान च 3 शा 5 डिग्री सेल्सियस तगर दी कमी दर्ज कीती जाई सकदी ऐ। ऊआं जम्मू, कश्मीर ते लद्दाख दे बी केई हिस्सें च तापमान सिफर थमां हेठ दर्ज कीता गेआ ऐ जदके उत्तर पच्छमी, मध्य ते पूर्वी भारत च पिच्छले 24एं घैंटे दरान घट्टोघट्ट तापमान 10 शा 15 डिग्री सैल्सियस रिकार्ड कीता गेआ। एह्दे अलावा पच्छमी ते मध्य भारत च अगले 24एं घैंटे दरान तापमान च कोई बड़ी बड्डी तब्दीली दिक्खने गी नेई लब्भोग। अगले द'ऊं दिनें दरान दिल्ली च मौसम साफ रौहग पर बडुलै मती सारी थाहें पर घना कोहरा छाए दा रेई सकदा ऐ।

<><><><><><>